



Terenga 4: Hōtaka 25 – tatari...kia/ki te

He Mihi

E tai mā, e kō mā, e mara mā, e hika mā, nau mai anō ki raro i te tuanui o tō tātou whare reo Māori, o Ako. E iri ana ki ngā pātū o tēnei whare ngā manako o te hunga kua riro, kia ora te reo tuku iho ki a Ngāti Pikipiki Ake. Mā tātou e tiki atu, e whakatinana.

Hei Mahi Whakarongo

Ko te reo o Ruakere Hond te whakamaunga atu o ō tātou taringa ā kō ake nei. Inā te ātaahua o te rere o te mita o te Hauāuru. Kia mataara mai, kia pai ai tō kapo ake i te ia o te kōrero. Anei ngā pātai hei whakautu mā koutou:

- 1) Ko tēhea manu ka rangona i te tīmatanga o te kōanga?
- 2) Ā hea te wā 'aroaro mahana'?
- 3) He aha te mahi ka mahia i te wā āhuru?

He Whakamārama

Anei tētehi o ngā rerenga kōrero a Ruakere:

“Nō reira, e **tatari** atu ana **kia** aroaro ma’ana.”

- Mena e tāria ana te wā, te taunga mai rānei o tētehi āhua, te mahinga rānei o tētehi mahi, ko te kupu '**kia**' te kupu mō muri i te kupu 'tatari'.
 - E tatari ana **kia** tō te rā. (wā = te tōnga o te rā)
 - E tatari ana **kia** puāwai te putiputi. (āhua = puāwai)
 - E tatari ana **kia** tae mai taku hoa. (mahi = tae mai)
- Mena e tāria ana tētehi mea, pēnei i te pahi, ko ngā kupu '**ki te**', '**ki + pūtohu**' ngā kupu mō muri i te 'tatari'.
 - E tatari ana au **ki te** wakarererangi.
 - E tatari ana taku hoa **ki te** pahi.
 - E tatari ana a Mere **ki tana** wakarererangi.

Hei Mahi

Whakamāoritia ngā rerenga kōrero:

1. I'm waiting for my mum to arrive.
2. I'm waiting for the stars to appear.
3. I'm waiting for you all to finish talking.
4. I'm waiting for the taxi.

Whakautu:

1. E tatari ana au kia tae mai taku whaea.
2. E tatari ana au kia puta mai ngā whetū.
3. E tatari ana au kia mutu tā koutou kōrero.
4. E tatari ana au ki te tēkehi.